

Cukupkah wang simpanan untuk persaraan?

Dari muka 15

“Statistik menunjukkan hanya sekitar 55 peratus ahli KWSP adalah pencarum aktif. Ini bermaksud sebahagian besar tenaga kerja, terutama dalam sektor informal dan gig, tidak mempunyai perlindungan persaraan formal,” katanya.

Beliau turut menekankan isu literasi kewangan yang rendah sebagai faktor tambahan.

“Ada yang mampu menyimpan, tetapi terdedah kepada penipuan, salah percaturan pelaburan atau pengurusan kewangan yang kurang tepat selepas bersara,” ujarnya.

Mengulas pengeluaran khas KWSP semasa pandemik, Rafiq berkata, langkah tersebut membantu rakyat menghadapi krisis tunai jangka pendek, namun memberi kesan jangka panjang terhadap simpanan persaraan.

“Simpanan berkurang se-

cara ketara, tempoh pemulihan mengambil masa bertahun dan risiko kemiskinan warga emas meningkat.

“Secara mudah, pengeluaran khas menyelesaikan krisis jangka pendek tetapi meningkatkan risiko jangka panjang,” katanya.

Dengan jangka hayat rakyat Malaysia yang semakin meningkat, beliau berkata, model persaraan sedia ada perlu dinilai semula.

Katanya, umur pengeluaran 55 tahun yang tidak selari dengan umur persaraan 60 tahun serta risiko hidup lebih lama daripada tempoh simpanan menimbulkan persoalan dasar yang wajar diteliti.

“Kajian oleh World Bank turut mencadangkan agar umur kelayakan manfaat sosial disemak semula selari peningkatan jangka hayat sihat.



**MOHAMAD IDHAM
MD. RAZAK**

“Dalam pada itu, ada juga kemungkinan berlakunya tekanan sosial baharu sekiranya majoriti rakyat memasuki usia tua tanpa simpanan mencukupi.

“Fenomena ‘reverse dependency’ boleh berlaku apabila anak terpaksa menyara ibu bapa, sekali gus menjejaskan keupayaan generasi muda membina aset sendiri,” katanya.

Data daripada Jabatan Per-



**RAFIQ HIDAYAT
MOHD RAMLI**

angkaan Malaysia (DOSM) menunjukkan risiko kemiskinan meningkat ketara mengikut umur, mencecah hampir 49 peratus bagi isi rumah berketua berumur 70 tahun ke atas.

Sementara itu, Pensyarah Kanan, Jabatan Ekonomi dan Pengajian Kewangan, Fakulti Perniagaan dan Pengurusan, Universiti Teknologi MARA (UiTM), Dr. Mohamad Idham Md. Razak berkata, peningkatan warga emas yang terus bekerja kerana keperluan kewangan dan bukan pilihan boleh membawa implikasi jangka panjang terhadap struktur pasaran buruh negara.

Menurut beliau, dari satu sudut, pengalaman dan kema-

hiran golongan berusia masih memberi nilai kepada ekonomi, khususnya dalam sektor perkhidmatan dan pekerjaan berasaskan pengetahuan.

Namun, jika keadaan itu berpunca daripada simpanan persaraan yang tidak mencukupi, ia boleh menandakan kelemahan dalam jaringan keselamatan sosial negara.

“Produktiviti mungkin terjejas sekiranya pekerjaan tidak disesuaikan dengan keupayaan fizikal warga emas, manakala peluang pekerjaan belia boleh menjadi lebih kompetitif dalam sektor tertentu, walaupun kesannya lazimnya bersifat sektoral dan bukan menyeluruh,” katanya.

Mengulas lanjut, beliau berkata, Malaysia sememangnya berdepan risiko menjadi negara menua sebelum mencapai status pendapatan tinggi sekiranya isu kecukupan persaraan tidak ditangani lebih awal.